

**Siunnersuummut uunga missingiut: Siusinaartumik pensionisiaqarnermut
maalaaruteqartarfik pillugu Namminersorlutik Oqartussat nalunaarutaat**

Siusinaartumik pensionisiat pillugit Inatsisartut inatsisaanni nr. 40, 9. december 2015-imeer-
sumi § 10, imm. 2 Inatsisartut Inatsisaatigut nr. 55 25. novemberi 2024-kkut
allanngortinneqartoq naapertorlugu aalajangersarneqarput:

Kapitali 1

Suliffeqarfik il.il.

§ 1. Siusinaartumik pensionisiaqarnermut maalaaruteqartarfik attuumassuteqarnani
qitiusoqarfimmit allaffissornikkut maalaaruteqarnermut oqartussaaffiuvoq, sulisinnaassutsip
annertussusaa pillugu nalilersuinikkut nalilersueqqinnikkullu kommunalbestyrelsemit
aalajangersaaffigineqartartut pillugit maalaarutininik suliarinnittartoq.

Katitigaaneq

§ 2. Siusinaartumik pensionisiaqarnermut maalaaruteqartarfik pingasunik ilaasortaqqarpoq,
matumani siulittaasoq ataaseq.

Imm. 2. Siusinaartumik pensionisiaqarnermut maalaaruteqartarfimmi ilaasortat
sinniisussallu Naalakkersuisut toqqagassaraat, tassani inuttut suliatigullu piginnaasat ukiuni
sisamani atuuffiusussami aallaavigineqassallutik.

Imm. 3. Siusinaartumik pensionisiaqarnermut maalaaruteqartarfimmi siulittaasoq tassungalu
sinniisussaq inatsisilerinermi kandidatitut soraarummeernermi angusisimassaaq.

Imm. 4. Siusinaartumik pensionisiaqarnermut maalaaruteqartarfimmi ilaasortaasut
taakkunungalugu sinniisussat tamatigoortumik suliaqarnermut-, isumaginninnermut- aamma
ilinniartitsinerup iluani kiisalu peqqissutsimut- aamma nakorsaqqarnermut pissutsinut
ilisimasaqassapput.

Imm. 5. Siusinaartumik pensionisiaqarnermut maalaaruteqartarfik siulittaasumik
akisussaaffigineqassaaq.

Allattoqarfik

§ 3. Siusinaartumik pensionisiaqarnermut maalaaruteqartarfimmik kiffartuussineq
allattoqarfiusumit isumagineqartassaaq, taanna ukiumut aningaasanut inatsisini
tapiissutigineqartut naapertorlugit sinaakkusiorneqassalluni.

Imm. 2. Allattoqarfik siusinaartumik pensionisiaqarnermut maalaaruteqartarfup
kiffartuunnerani aalajangiisinnaatitaanngilaq imaluunniit maalaarutininik suliaqarnermi
sulisinnaassutsip nalilersorneqarnerani sunniuteqarsinnaatitaalluni.

Imm. 3. Allattoqarfup sulinera Siusinaartumik pensionisiaqarnermut maalaaruteqartarfup
sulериusaani aaqqissugaassaaq.

Ataatsimiinnerit

§ 4. Siusinaartumik pensionisiaqarnermut maalaaruteqartarfik §§ 5, 6, 7 aamma 8 naapertorlugit maalaarutininik suliaasaqartillugu ataatsimiititaliaq naapittassaaq.

Imm. 2. Siusinaartumik pensionisiaqarnermut maalaaruteqartarfik ilaasortat taakkualuunniit sinniisussaamut tamarmiusut peqataatillugit aalajangiisinnaassuseqassaaq.

Suleriuseq

§ 5. Siusinaartumik pensionisiaqarnermut maalaaruteqartarfiup nammeneq suleriesissani aalajangersassavaa.

Imm. 2. Siusinaartumik pensionisiaqarnermut maalaaruteqartarfiup suleriesaa Atuisoqarnermut- aamma Unammilleqatigiinnermut aqutsisoqarfiup nittartagaani aalajangersarneqariartoq tamanut saqqummiunneqassaaq.

Naammagittaalliorsinnaatitaaneq il.il.

§ 6. Siusinaartumik pensionisiaqarnermut maalaaruteqartarfiup nammeneerluni maalaarutit tigusanik imm. 2, 3 aamma 4 naapertorlugit suliarineqarsinnaanersut nalilersortassavaa.

Imm. 2. Siusinaartumik pensionisiaqarnermut maalaaruteqartarfiup sulisinnaassutsip annertussusaa pillugu nalilersuinikkut nalilersueqqinnikkullu kommunalbestyrelsemut aalajangersaaffigineqartartut pillugit maalaarutit suliarisassavaa.

Imm. 3. Siusinaartumik pensionisiaqarnermut maalaaruteqartarfiup siusinaarluni pensionisiaqarneq pillugu maalaarutit assigiinngitsunik imaqtartut minnerpaamik imarisaani ataaseq sulisinnaassutsip annertussusaa pillugu nalilersuinnermut nalilersueqqinnermullu tunngassuteqarpat suliarisassavaa.

Imm. 4. Siusinaartumik pensionisiaqarnermut maalaaruteqartarfiup maalaarutit imarisai siusinaartumik pensionisiaqarnermut tunngasut maalaarummi suliarisassavaa, apeqqutaanani maalaarut suliaasaqarfinnut allanut tunnganersoq minnerpaamik imarisaani ataaseq sulisinnaassutsip annertussusaa pillugu nalilersuinnermut nalilersueqqinnermullu tunngassuteqarpat.

§ 7. Siusinaartumik pensionisiaqarnermut maalaaruteqartarfiup aalajangiussai sulianut tamakkiisumik isiginnilluni nalilersuinikkut aalajangerneqartassapput.

§ 8. Maalaarutininik suliaqarnermi aalajangiinnerit amerlanerussuteqarnikkut aalajangiunneqartassapput.

§ 9. Maalaaruteqarnermi kinguartinneqarsinnaanngitsut siulittaasumit aalangiiffigineqarsinnaatitaapput, matumani assortoruminaatsumik aalajangiinissamut tunngavissaqartoqarpat ataatsimiititaliarlu naapisinneqarsinnaanngippat.

Imm. 2. Siulittaasoq aalajangiisimatillugu Siusinaartumik pensionisiaqarnermut maalaaruteqartarfimmi ilaasortat ilisimatinneqartassapput.

§ 10. Siusinaartumik pensionisiaqarnermut maalaaruteqartarfiup aalajangiussai allaffisornikkut maalaarutininik ingerlatsivimmut allamut atuutsinneqarsinnaanngillat.

Peqataasinnaassuseqannginneq

§ 11. Siusinaartumik pensionisiaqarnermut maalaaruteqartarfimmi ilaasortaq peqataasinnaassuseqanngikkuni suliamut aalajangiisinnatitaanngilaq, aalajangiinermi peqataasinnaatitaanani imaluunniit suliap suliarineqarneranut attuumassuteqaqqusaanani.

§ 12. Ilaasortaq pissutsinik peqataasinnaassutsiminut apeqqusiisinnaasunik ilisimasaqaleriaruni erngerluni Siusinaartumik pensionisiaqarnermut maalaaruteqartarfiup siulittaasua tamatuminnaga ilisimatissavaa.

Imm. 2. Ilaasortamut sinniisussaq suliaq pineqartoq ilaasortaasup peqataasinnaassuseqarfiginngisaa suliarineqalerpat aggersarneqassaaq.

Imm. 3. Ilaasortamut sinniisussaq aamma peqataasinnaassuseqanngippat siulittaasoq matumani ilaasortanut allanut sinniisussamik suliap pineqartup suliarineqarnissanut toqqaassaaq.

§ 13. Naalakkersuisut. Siulittaasoq pissutsinik peqataasinnaassutsiminut apeqqusiisinnaasunik ilisimasaqaleriaruni erngerluni Naalakkersuisut tamatuminnaga ilisimatissavai.

Imm. 2. Suliap siulittaasup peqataasinnaassuseqanngiffigisaata pineqartup suliarineqarneranut Siulittaasumut sinniisussaq aggersarneqassaaq.

Imm. 3. Siulittaasumut sinniisussaq aamma peqataasinnaassuseqanngippat Naalakkersuisut matumani suliap pineqartup suliarineqarnissanut Siulittaasuugallartussamik toqqaassapput.

Nipangersimasussaatitaaneq

§ 14. Siusinaartumik pensionisiaqarnermut maalaaruteqartarfimmi ilaasortat sinniisussallu pisortani sulisunut nipangersimasussaatitaanermut maleruaqqusaasut atuutsinneqartut naapertorlugit nipangersimasussaatitaapput.

Imm. 2. Nipangersimasussaatitaaneq paasissutissanut tamanut pineqartut Siusinaartumik pensionisiaqarnermut maalaaruteqartarfimmi sulinermini pissarsiarisimasaanut tamanut atuuppoq.

Imm. 3. Siusinaartumik pensionisiaqarnermut maalaaruteqartarfiup allattoqarfia Siusinaartumik pensionisiaqarnermut maalaaruteqartarfimmi ilaasortat sinniisussallu assigalugit nipangersimasussaatitaavoq.

Kapitali 2

Kiffartuussinnermi anguniakkat

§ 15. Kingusinnerpaamik siusinaartumik pensionisiaqarnermut maalaaruteqartarfik maalaarummik tiguseranerit ullut 14 qaangiutsinnagit tiguseraneranut uppersaammik maalaarutiginnittoq tigusaqareersimassaaq, tassani suliarineranut piffissaq naatsorsuutigineqartoq, suliap ingerlanissaa allallu paasissutissat pisariaqarsinnaasut paasissutissiissutigineqassallutik.

§ 16. Maalaarummik tigusaqareernerata kingorna kingusinnerpaamik qaammat ataaseq qaangiutsinnagu Siusinaartumik pensionisiaqarnermut maalaaruteqartarfiup § 5 naapertorlugu maalaarutip suliarinissaa pivusorsiorpalaarnersoq nalileereersimassapput.

Imm. 2. Siusinaartumik pensionisiaqarnermut maalaaruteqartarfik naliliisimappat, maalaaruteqartarfik § 5 naapertorlugu maalaarut tiguneqarsimasoq suliarineqarsinnaanngitsoq tamanna maalaaruteqartumut allakkatigut maalaaruteqartartoq eqqortoq pillugu ilitersuutit pisariaqartut ilanngullugit nalunaarutigineqassaaq.

Imm. 3. Siusinaartumik pensionisiaqarnermut maalaaruteqartarfiup maalaarutip suliarinissaanut allagaatit pisariallit tiguseranngippagit, tamanna maalaaruteqartumut suliap suliarineranut piffissap suliallu ingerlanissaanut naatsorsuutigineqartut allanngorneri pillugit allakkatigut ilisimatitsissutigineqassaaq.

§ 17. Kingusinnerpaamik maalaarutimmik tigusaqartoqarneranit qaammatit arfinillit qaangiutsinnagu Siusinaartumik pensionisiaqarnermut maalaaruteqartarfik § 5 imm 2, 3, aamma 4 naapertorlugu maalaarutip suliarisinnaatitaanera pillugu aalajangeereersimassaaq.

Imm. 2. Imm. 1 naapertorlugu aalajangiineq pisinnaasimanngippat tamanna maalaaruteqartumut allakkatigut matumunnga patsisaasoq pillugu kiisalu inaarutaasumik naliliisoqarnissaanut piffissaq naatsorsuutigineqartoq ilanngullugu allakkatigut nalunaarutigineqassaaq.

§ 18. Kingusinnerpaamik maalaarummik tiguseraqarneranit qaammatit arfinillit qaangiussimatinngagit Siusinaartumik pensionisiaqarnermut maalaaruteqartarfik maalaarut imaluunniit malaarutip imarisaani suliatik tamarmik aalajangiiffigereersimassavaat.

Imm. 2. Imm. 1 naapertorlugu piffissarititaasup iluani aalajangiinissaq pisinnaasimanngippat tamanna maalaaruteqartumut allakkatigut matumunnga peqqutaasoq ilanngullugu kiisalu inaarutaasumik suliap naammassineqarnissaanut piffissaq naatsorsuutigineqartoq ilanngullugu nalunaarutigineqassaaq. Allakkiaq ilisimatitsissutitut Isumaginninnermut Naalakkersuisumutaaq nassiunneqassaaq.

Kapitali 3

Maalaaruteqartarfiimi ilaasortanik siusinaarluni atuukkunnaarsitsineq peersitsinerluunniit

§ 19. Siusinaartumik pensionisiaqarnermut maalaaruteqartarfiup siulittaasua sivisuumik napparsimaneq, nukissaaleqineq imaluunniit allamik peqquteqarluni suliamik

ingerlatsisinnaangitsutut naliliiffigineqarpat Naalakkersuisut qinigaaffiup pineqartup sinneranut atuukkunnaarsissinnaatitaavaat.

§ 20. Siulittaasumit inassuteqaateqartoqareerneratigut Naalakkersuisut ilaasortamik qinigaaffiup pineqartup sinneranut atuukkunnaarsitsisinnaapput.

Imm. 2. Piffissaq sioqqullugu ilaasortamik atuukkunnaarsitsisoqarpat tassunga sinniisussaq ataatsimiititaliamut ilaasortanngussaaq.

Imm. 3. Ilaasortanngortumut sinniisussamik Naalakkersuisut toqqaassapput.

Kapitali 4

Maalaaruteqartarfimmi ilaasortanut akissarsititsisarneq

§ 21. Siusinaartumik pensionisiaqarnermut maalaaruteqartarfimmi ilaasortat Inatsisartuni ilaasortaangitsunut ataatsimiititaliani, nævnini sinniisoqarfinni assigisaanilu peqataanerni akissarsiaqartitsinermut Inatsisartut aamma Naalakkersuisut il.il akissarsiaqartinneqarneri pillugit Inatsisartut inatsisaanni malittarisassat naapertorlugit pissarsiaqassapput.

Imm. 2. Sinniisut ataatsimiititaliami ilanngunermikkut akissarsiaqarsinnaatitaapput.

Kapitali 5

Atuutsitsilerneq ikaarsaariarnermilu malittarisassat

§ 22. Nalunaarut ullup atuuttussatut aalajangiiffigineqarnerata aqaguani atuutilersinneqassaaq.

§ 23. Nalunaarutip atuutilersinneqarneraniit Siusinaartumik pensionisiaqarnermut maalaaruteqartarfimmi maalaarutinit tiguneqartunut nalunaarut inatsisisitigut sunniuteqassaaq.